

四庫全書

子部

欽定四庫全書

冊府元龜卷一百七十二 宋 王欽若等 撰

帝王部

求舊第二

唐高祖初為唐公尅京師隋左親衛竇靖德以親故之恩見之甚悅歷拜周大總管司馬遷長史

武德元年五月即位凡有賓客故吏咸加升擢率意進用不限階資

二年閏二月甲寅帝引見并州元從將校以下謂之曰  
朕起義并州以救元元之命實諸君之力也卿輩執羈  
勒從我已三歲矣朕每念之無忘寢食待東都平定當  
放卿還故鄉衆皆曰幸遇龍興獲展微効俱沾不次之  
賞今天下未定豈敢辭勞但陛下初發太原許定天下  
之後與臣輩同幸并州今鑿輿未動臣下何能獨去帝  
曰昔有此言朕所以不忘於是廩食其妻子

是月己巳隋吏部侍郎楊恭仁進見帝為之興引與同

坐言疇昔為歡者久之

三年二月辛丑隋殿內少監豆盧達自東都來奔與帝有舊引入卧內讌賜甚厚

三月戊辰隋尚食奉御郭弘道自東都來歸弘道字太寶帝初為殿中少監深喜之及踐阼弘道在東京帝每遣門人訪其在沒聞其來也遂遣使迎勞於道及此引見涕泣曰臣識龍顏在天下之先今拜闕庭在衆人之後臣之罪也於是引入卧內言及疇昔夜久乃罷賞賜

萬計拜同州刺史在州思慕不肯理事徵拜衛尉卿尤蒙翫狎仍下優詔每參見奏事特令昇殿

孔紹安隋末為監察御史監帝軍深見接遇帝受禪紹安自雒陽間行來奔帝見之甚悅拜內史舍人

陳政初仕隋為謁者兵曹宇文化及之逆以為太常卿委之禦侮政數勸化及歸國化及不能乃亡歸長安化及失政之後三軍奪氣兵勢益弱帝與之有舊聞其來也大悅遣使迎勞及至賜宴極歡尋授內史舍人

許紹初仕隋為夷陵郡通守後遣使歸國拜陝州刺史  
封安陸郡公帝與紹有舊因下詔曰昔在青衿同遊庠  
序博士吳琰其妻姓仇追想此時宛然在目荏苒歲月  
遂成累紀且在安州之日公家乃蒞岳州渡遼之時伯  
裔又同戎旅安危契濶累葉同之其間遊處觸事可想  
公追硯席之舊歡同通家之曩好爰自荆門馳心絳闕  
覽此忠至彌以慰懷

張瑾隋末陷王世充及雒陽平詔徵瑾入朝以舊恩厓右

衛大將軍軍器太監帝哀其年老從容謂之曰公筋力漸衰過爾勞曳無乃辛苦耶朕不惜官但恐相損瑾固請曰幸遇明時願得陪奉帝頷之及為羽林將軍遇突厥來寇瑾不戰保于幽州帝以其年老拜冠軍將軍優以散秩

太宗以武德九年八月即位九月戊戌賜舊邸僚舊下逮胥吏帛各有差又宴舊府佐及學士於弘教殿賜物各有差

貞觀十五年五月壬申并州道士及僧父老等二百人詣闕上表稱太原王業龍興之地明年登封已後願時臨幸

臣欽若等曰是年四月有詔封泰山故父老等有禮畢臨幸之謂

帝賜宴于武成殿顧

謂侍臣曰朕少在太原喜羣聚博戲暑往寒逝將三十年矣因與舊識者陳說往事以為笑樂因謂之曰他人之言或有面諛公等朕之故人實以告朕即日政教於百姓何如人間得無疾苦耶故老咸稽首言四海太平百姓歡樂陛下之力也臣等餘年日惜一日但眷戀聖



化不知疾苦因固請幸并州帝曰飛鳥過故林尚徘徊  
躑躅况朕於太原起義遂定天下永言懷舊誠所不忘俟  
東封還或與公相見耳各賜物而遣之其不來者仍降  
璽書存問之曰昔隋末喪亂百姓凋殘酷法淫刑後煩  
賦重農夫釋耒工女下機徵召百端寇盜蜂起人懷怨  
憤各不聊生水火之切未足為喻先朝不忍塗炭思濟  
黎元朕稟承神筭奮劔南起與彼境英雄同心協力不  
顧軀命以救蒼生爰自晉陽興兵立義雄鋒接刃櫛風

沐雨除凶去暴布德行仁天下乂安戎車止息九夷八  
狄莫不來庭以至於今二十餘載豈予一人所能致此  
實賴天地之靈宗社之福賢人君子為朕股肱文士盡  
其才智武夫宣其武力朕端拱無為庶幾王道然漢祖  
悲歌嘗思豐沛晉皇吟咏唯在溫原此人情也況并部  
之地創業之基與諸父老首立大事引領北望感慕兼  
深思與父老一日敘舊懷之在心所不忘也但海內殷  
曠萬機事多巡省四方未獲周悉父老宜約勒鄉黨教

導後生親踈子弟務在忠孝必使風俗敦厚異於他方  
副朕此懷光示遠邇使旌表門閭榮寵家國書名竹帛  
豈不美乎夏序甚熱想各平安善自怡養動靜聞奏故  
有此勅想見朕心

十六年十一月甲子帝幸慶善宮召武功之郃城立節  
三時豐義四鄉士女七十已上及居宮側數百人賜宴  
焉帝謂之曰朕幼遭隋亂櫛風沐雨饑不遑食以救蒼  
生百姓得無死亡二十餘年矣今重還舊鄉與父老相

見此宮先皇所居朕之生處至此傷心觸物增感因泣  
下需襟羣臣莫不歔歔又曰今召父老言宴少自寬割  
耳又謂羣臣曰人或時覽物不能自知朕昔在隋朝五  
品初不可望公等其時多有未仕朕今君臨四海公等  
並居高列君臣相遇千載一時朕與諸公豈各自知也  
遂縱酒盡歡其父老中或宿經役事或舊媪倉頭皆蹈  
舞勸醉爭前上壽或因言屈滯者帝咸理之宴畢賜帛  
各有差其無官者並加泛級

二十年帝征遼還幸并州引從官及太原父老宴賜物  
有差因下詔曰太原之地興運所階全晉之人義深惟  
舊自朕恭膺寶歷二紀于茲何嘗不御宸長懷想崑陵  
之風雨臨軒遠感念大麓之雲雷當於此時乃忘身而  
拯溺實賴同德並贏糧而樂推役不踰年遂清區域諒  
繇成都之衆謳訟闡虞帝之功戰牧之徒歌舞興周王  
之業仗茲協力竟至昇平懷彼勤勞何忘晷刻既因垂  
拱之暇再省創業之方周歷郊原宛如疇昔訪其父老

已多長謝不見所識魏后遂以興嗟卹彼故人漢高因  
而式宴前王是日哀樂交懷在朕深衷義符于此是用  
具陳廣樂共申高宴取譬還譙之賞同彼幸代之情仍  
曲赦并州管内大辟罪已下繫囚見徒皆赦除之常赦  
所不免者不在赦例又以前銀青光祿大夫遼山縣伯  
溫昂為金紫光祿大夫保晉陽之舊也

二十一年開府儀同三司高士廉薨帝聞之流慟將往  
哭之房玄齡頓首諫曰陛下久御藥石不可臨喪去歲

聖躬不安康復甫爾臣等敢以死請帝曰朕此行也豈獨君臣之禮歟兼以故舊情深恩戚義重一朝長逝恣而不哭之乎卿等勿復言也乃從數百騎出興安門司徒長孫無忌哭於喪側聞駕來馳往奉見涕泣馬前諫曰餌石臨喪經方明忌臣之目見誠有所徵陛下含育黎元須為宗社珍愛臣亡勇士廉知將不救嘗謂臣曰至尊覆載恩隆不遺替履亡沒之後或致親臨生存虛荷榮班無酬聖德安可以北首夷衾輒回鑾駕魂而有

靈負譴斯及不願親臨期於必遂其言甚切帝終不聽  
無忌中道伏卧涕泣交流帝感之還入宮苑南望而哭  
雨洒沾衣從官無不屑涕

載胄初仕齊為鄭州長史帝尅武牢而得之引為士曹  
參軍武德末以藩邸之舊除兵部郎中

薛萬淑以屢有戰功拜上柱國封武城郡公帝與之有  
舊引為護軍及嗣位拜右領軍尋鎮黃龍檢校東校尉  
崔善為尚書左丞後歷大府大理司農陝秦二州所在



之職皆名幹理雖頻以罪失官然以相府僚舊旋被升  
用

蕭瑒隋煬帝蕭后之弟義寧中陷王世充為工部尚書帝  
之平東都也引為諮議貞觀中以藩邸僚家歷黃門侍  
郎太子右庶子

褚亮為通直散騎常侍致仕歸于家帝行幸雒陽及成  
翠微宮賜亮詩每有隔澗想思之句及駕幸遼東亮子  
遂良為黃門侍郎詔遂良謂亮曰昔興師旅卿嘗入幕

今茲遐代君已懸車倏忽之間移三十載眷言疇昔我  
勞何如今將遂良東行想公於朕不惜一兒於膝下耳  
故遣陳離意善居加食亮奉表陳謝其為款舊如此及  
至寢疾詔令高手醫將藥救療中使候問不絕卒時年  
八十八帝甚哀惜之再三言及流涕

張後盾初在太原侍帝講經史貞觀初為燕王詔議從  
王入朝特被召見屢蒙顧問後盾因奏言陛下龍潛之  
日常問臣隋氏運終何族當得天下臣對曰李姓必得

拯厥橫流實資仁聖公家德業天下係心若於此首謀  
順天而動黃河以北指撝可定然後長驅關右以圖帝  
業萬姓喁喁孰不幸賴帝曰此事並記之耳因賜讌於  
月池言及平昔乃從容謂後胤曰今日弟子何如後胤  
奏曰昔孔子領徒三千遠者無子男之位臣翼贊一人  
即為萬乘之主計臣此功逾於先聖帝以為笑樂乃令  
羣臣難問後胤左傳謂之曰朕昔就卿受春秋今猶不  
忘後胤謝曰陛下天縱聖德稟自生知臣不敢貪天之

功以為已力帝大悅賜以御馬及諸物遷燕王府司馬  
後為睦州刺史因入朝乞骸骨帝召問曰朕與卿刺史  
資以自養何謂即求致仕後胤對曰年老筋力不健望  
得還私第時見厥庭帝曰卿力猶強欲何官也後胤陳  
謝不敢帝曰朕昔從卿讀書卿今日從朕求官但言所  
欲不相違也時國子祭酒缺後胤奏言之因授國子祭  
酒俄遷散騎常侍又請致仕許之加金紫光祿大夫聽  
朝朔望

裴寂既流靜州會山羌為亂寂率家僮破之帝思其佐命之舊徵入朝會卒帝聞而傷之贈相州刺史工部尚書河東郡公

高宗在春宮時蕭德言為侍讀及嗣位以師傅恩加銀青光祿大夫持令全給祿俸遣通事舍人就家致問仍令乘輿至肅章門引見優禮甚厚賜帛百疋因是晉府及東宮舊侍讀許叔牙等身沒者子孫並增秩賜物焉永徽二年十二月贈故中書令馬周為尚書右僕射以

東宮舊僚故也

顯慶二年十月幸鄭州以高祖在隋嘗牧滎陽有經事高祖任郡佐史布衣以上身見在即以名聞

五年正月幸并州至澤州之長平頰帝以歷試此境賜父老等布帛有差

龍朔元年九月幸天宮寺以是高祖龍潛舊第賜絹五百疋度僧二十七人

麟德元年九月丙子至自萬年宮便幸舊宅停七日丁

丑宴羣臣賜物有差

總章二年九月幸岐州以高祖任隋為扶風太守故曲  
赦岐州仍賜高年衣物粟帛各有差

中宗神龍元年四月宴房州父老於雒城南門各賜勳  
一級帛十五段又以衛尉卿同平章事魏元忠為兵部  
尚書韋安石為吏部尚書太子賓客平鄉縣公李懷遠  
為右散騎常侍兵部尚書同中書門下三品酒泉縣公  
唐休璟為輔國大將軍中書令博陵郡公崔玄暉為特

進檢校益州都督府長史判都督事京師畱守戶部尚書同中書門下三品兼檢校雍州長史弘農郡公楊再思兼檢校揚州大都督府長史判都督事國子祭酒同中書門下三品祝欽明為刑部尚書仍並同中書門下三品帝在春宮元忠等繼為左右庶子等官至是故有斯授又追贈故文昌左相劉仁軌為太尉故太子詹事蔣儼為禮部尚書皆以春宮舊僚故也

三年四月庚寅幸薦福寺其故吏周府官從至寺者各



賜勲一轉崔敬嗣則天初為房州刺史帝為廬陵王安  
置在州官吏多無禮惟敬嗣獨中禮致敬又供給豐贍  
帝常德之及登位有益州長史崔敬嗣既同姓名每進  
擬官皆御筆超拜之者數四後引與語乃知誤訪敬嗣  
已卒乃遣中書令韋安石授其子官

睿宗景雲二年三月故吏部尚書張嘉福追復官爵嘉  
福神龍初為吏部尚書兼相府長史唐隆元年同中書  
門下三品河北道宣勞使嘉福昵宗楚客附悖逆庶人

及楚容誅有制斬之使未至嘉福次懷州牒令禁錮司  
法遽殺之尋後勅放于嶺表而嘉福已死帝即位以藩  
邸舊臣復官焉

玄宗初在春宮褚無量為國子司業兼太子侍讀及即  
位遷郊王傅兼國子祭酒尋以師傅恩遷左散騎常侍  
仍兼國子祭酒封國公賜實封三百戶

開元二年八月詔曰朕聞士之生代始於事親中於事  
君終於立身此其本也若乃移孝成忠策名委質命有

太山之重義狗則為輕事有疾風之力節全則為勁況君臣之相遇而故舊之不遺乎銀青光祿大夫殿中監楚國公姜皎簪紱聯華珪璋持秀寬厚為量深沉合謀靜而安仁動能體國往居藩邸潛歛風雲亦猶彭祖之同書子陵之共學朕嘗遊幸于外至長楊墟社之間皎於此時與之累宿私謂朕曰太上皇即當九五王必為儲副儿如此者數四朕叱而後止寧知非僕雖玩於鄧晨可收護軍遂訶於朱祐皎復言於朕兄弟及諸駙馬

等因聞徹太上皇太上皇遂奏於中宗孝和皇帝皇帝  
尋遣嗣虢王邕等鞫問皎保護無怠詞意轉堅李通之識  
記不言田叔之髡鉗罔憚乃為宗楚客紀處訥等密奏  
譎皎炎荒中宗特降恩私遷潤州長史讒邪每構忠懇  
逾深戴於朕躬憂存王室以為天且有命預覩成龍之  
徵人而無禮嘗懷逐鳥之志游辭枉陷旋罹貶斥嚴憲  
將及殆見誅夷履危本於初心遭險期於不貳雖禍福  
之際昭然可圖而艱難之中是所繫賴洎朕祗膺寶位

又共翦奸臣拜以寵光不忘撝挹敬愛之極神明所知  
造膝則曾莫詭隨匪躬則動多規諫補朕之闕斯人孔  
臧而悠悠之談嗷嗷妄作醜正惡直竊生於謗考言詢  
事益亮其誠昔漢昭帝之保霍光魏太祖之明程昱朕  
之不德庶幾於此矧夫否當其悔則滅宗毀族朕負之  
必深泰至其亨則如山如河朕酬之未補豈流言之足  
聽而厚德之遂忘謀始有之罔終可也宣告中外咸令  
悉知

九月詔曰明王垂訓則罪不相及善人懼罰則刑不可濫繇是毋嘗直言豈坐趙括魚既從戮寧遺叔向古之道也朕所務焉衛尉少卿崔滌竭誠奉國忘體事君曾同下杜之遊頗若中陽之舊誠表於先覺節全於後凋其兄湜素蓄異圖交結亮黨滌雖懷在原之急深憂闔室之刑動靜則開始終必盡為臣不隱唯滌有之言念厥功曷云從坐況老父就殞諸兄繼歿揺落變衰有足矜憫賞罰勸沮宜判忠邪滌家除兄湜一房外餘並不

須為累

滌今名澄玄宗在藩邸與之同里而居錄是有舊景龍中玄宗之潞州賓友餞別者自國門而

旋滌獨從至于革及登極恩眷甚厚賞賜相繼恩渥之盛當時無比帝以其朝夕宮掖出入無間慮有所漏洩乃于滌坊上親札慎密二字以識之

五年七月制曰西漢諸將多以權貴不全南陽故人宜以優閒自保觀夫先後吉凶之數較然可知良有以也太常卿上柱國楚國公監脩國史姜皎衣纓奕代忠謹立誠明識比於橋玄密私方於朱祐朕昔在藩邸早申款洽嘗博我以不遺亦起予以自愛及膺大位屢賜崇

班茅土列爵河山傳誓備蒙光寵特冠等夷朕每欲其  
戒盈用克終吉未若避禁公府守靖私第自弘高尚之  
風不涉囂塵之境沐我恩貸庇爾子孫宜歸田園以恣  
娛樂散官勲封並如故時皎弟晦為吏部侍郎兄弟當  
朝用事侍中宋璟以其權寵太盛恐非久安之道屢奏  
請消損之故有是命後坐漏洩禁中語配流於雷州死  
于中路帝思皎舊勲令遞其柩還制曰念舊飾終仰惟  
令典故祕書監姜皎頃在屯難頗申誠績運屬光華遂



延恩澤而過繇驕怠遽隔幽明言念往初有深矜悼宜  
寵泉宥以示不忘可贈澤州刺史

六年二月以少府監齊景冑為益州大都督府長史充  
劔南道度支防禦兼松常姚蕩等州處置兵馬使以隰  
州刺史兗國公陸象先為潤州刺史岳州刺史燕國公  
張說為荊州大都督府長史海州別駕員外置同正員  
韋嗣立為陳州刺史沔州刺史張廷珪為蘇州刺史洋  
州刺史賈曾為慶州刺史皆坐貶久之特恩甄敘為其

舊也

十一年正月幸潞州以歷試舊宅為飛龍宮詔曰朕巡狩晉陽觀風問俗肆覲羣后存問百年候於境者仰為故事今停蹕潞州勞以牛酒其外州刺史及迎駕父老道士女道士僧尼等遠來至此頗以艱辛宜並令預會刺史賜物四十疋父老以下各賜物三疋又勅太原府境內其有沈淪草澤抱德栖遲及武德功臣子孫并元從子孫才堪文武所屬官者並委府縣搜揚具以名薦

辛卯詔并州置北都改州為太原府癸巳親製起義堂  
頌刻石紀功于太原府之南街

二十年十月北狩至潞州勅曰朕往在藩邸遊歷潞城  
歲月頗多人情亦厚今因巡省再過此邦初至歡呼皆  
有繇衷之感將去停立益知戀主之誠言念此心孰不  
能辨雖天下為一政有何殊而王者無私議不謂此特  
宜優異以納羣心其潞府百姓丁壯等免征行令其分  
番宿衛定名長從仍委長史韋虛心審問父老百姓等

如此處置可否奏聞

天寶七載正月制曰哲王垂範既有寵於勲庸先聖立  
謀諒不遺於故舊贈澤州刺史姜皎身心敏識雅量通  
才夙懷經濟之能且著文辭之美往居藩邸早奉款誠  
及登寶位嘗進忠讜漢高之念盧綰魏祖之重橋玄彼  
此一時我亦無愧永言徽烈豈忘褒崇宜加贈於八座  
更開封於百室可贈吏部尚書仍賜實封三百戶與子  
孫永克享祀

肅宗以至德元年七月即位於靈武詔東宮官屬既會  
昌期合承寵命量加改轉

李泌自天寶末待詔翰林仍東宮供奉帝甚禮之泌為  
楊國忠所忌出蘄春郡及帝即位遣使訪召會泌自嵩  
穎間行至彭原郡謁見陳今古成敗安危之機契於宸  
衷延至卧內動皆顧問泌稱山人故辭祿秩以散官寵  
之特拜銀青光祿大夫仍知元帥廣平王行軍司馬事  
杜鴻漸為朔方節度判官會帝承命北巡徵兵討逆屯

于靈武鴻漸得謁見及即位之際鴻漸以定策功遷中書舍人兼判兵部侍郎

代宗寶應元年七月即位優詔東宮官僚並與改轉願守本官者亦聽李進初為帝東征從事又為皇太子元帥參佐後至兵部侍郎卒帝甚悼之制曰朕在藩邸理兵西夏建于元子受律東郊時更否泰再同休戚其恩遇如此贈禮部尚書

德宗即位初以國子博士翰林學士張涉為左散騎常

侍仍為學士帝自居春宮涉嘗為侍讀及嗣位後庶政小大皆咨之恩禮甚崇多所弘益俄受前湖南觀察使辛杲金事覺以恩舊不之罪廢于家

建中初帝以駙馬都尉柳諱子成嘗有硯席之舊日加渥澤

興元初贈尚書左丞趙涓禮部尚書涓永泰初為御史禁中失火焚屋室數十間與東宮稍逼近代宗深驚疑之涓時為巡使俾令即訊涓周歷墻周按驗證據乃上

直官遺火所致也推鞠明審頗盡事情既奏聞代宗甚嘉賞焉帝時在東宮嘗感消之究理詳細及為衢州刺史年老既深又與觀察使韓滉不相得滉奏請免其官帝見其名謂宰相曰豈非永泰初御史趙消乎對曰然即日拜尚書左丞俄知吏部選事扈從梁州而卒

順帝以貞元二十一年正月即位制以給事中馮伉為兵部侍郎以兵部員外郎史館修撰歸登為給事中修撰如故伉及登皆帝在東宮時侍讀以師傅恩拜



憲宗在藩邸張宿因軍使張茂宗得出入東宮辯譎敢言洎監撫登位之際驟承顧幸擢居諫列以舊恩數召入禁中終諫議大夫

武元衡仕德宗為御史中丞順宗即位王叔文等不悅之罷為右庶子帝始冊為皇太子元衡贊引因識之及登極復拜御史中丞

穆宗以元和十五年正月即位閏月以駕部員外郎丁公著為給事中兵部郎中薛放為工部侍郎咸以東宮

舊恩起獎初放為皇太子侍讀及嗣位未聽政間放多在左右密參機務帝嘗謂放曰小子初承大寶懼不克負荷先生宜為相以匡不逮放叩頭曰臣實庸淺不足當重任乞陛下授以能者帝尤用嘉歎賜以金紫加集賢殿學士雖事任非切而恩顧轉隆又轉刑部侍郎禮部尚書兼學士如故

二月御丹鳳樓大赦詔東宮官及侍讀普恩之外賜爵加階仍並與進改

三月以檢校司空兼太子少師判國子祭酒事鄭餘慶為檢校司徒餘如故加太子少傅兼判太常卿事韓臯檢校太僕射並以東宮師保之舊進秩也以太子賓客李益為右散騎常侍太子詹事分司東都韋貫之為河南尹太子賓客田融為太子少保兼太子詹事依前留司益等亦以春宮舊僚進秩

四月以前虔州刺史韋綬為尚書左丞綬前為諫議大夫侍讀東宮帝深禮敬至是以舊恩超擢未幾復加集

賢學士

敬宗長慶四年正月即位三月以太子少保張弘靖為  
太子少師分司東都太子賓客令狐楚為河南尹兼御  
史大夫太子賓客李益為左散騎常侍太子賓客張賈  
為右散騎常侍並以宮僚加恩也

文帝初封江王寶曆二年十二月即位太和元年正月  
敕江王府官去年十二月已前在任者並與進改

後唐莊宗同光元年十二月車駕在洛京丁丑太原者

老薛漢等八十人詣闕稱慶見於嘉慶殿帝以豐沛之民親自慰諭給賜有差

二年六月贈故河東節度副使右諫議大夫李襲吉禮部尚書故河東節度副使禮部尚書蘇循為尚書左僕射故河東節度副使戶部侍郎盧汝弼為兵部尚書故河東管內觀察判官檢校尚書左僕射司馬揆為司空故河東留守判官工部尚書李敬義為尚書左僕射皆河東舊僚也

十一月贈故天雄軍節度副使王緘為司徒緘燕人初為劉仁恭幕吏天祐四年仁恭遣緘使鳳翔路隸太原及復命燕晉不通帝留之言不遜命繫于獄尋脫之署巡官帝待之甚厚時有馬郁者亦仁恭之幕賓也三年冬仁恭令郁將兵三萬會於晉陽攻潞州因茲亦留於晉帝以郁為畱守判官郁緘俱有文才然郁博通多識才性朗俊下筆成章郁死軍書墨制多出於緘初從定魏州為節度判官暮年為副使帝寵顧甚隆及胡柳之

後緘於輜重間為亂兵所殺帝聞之欷然曰副使應至不測翊月得其喪以歸至是追贈

明宗在潛時同光中賜得梁租庸使趙巖雜中宅宅雖華以趨內遠乃與羅周敬易其第諾之其第即周敬父紹威前唐時所建在福善里後帝即位一日夢中見一人儀形瓌秀若素識者帝夢中曰此得非前宅主羅氏乎及寤訪其子孫左右對曰周敬見列明廷召至果符夢中所見帝謂侍臣曰朕不欲使大勲之後久無土地

因授左馮非承家為善何以致此

天成元年七月中書門下奏太原潛龍宅請以積慶宮  
為名從之

是月勅漢朝昇沛魏祖封譙當化家為國之時行奉先  
思孝之道矐惟應郡跡乃帝鄉宜師古而建邦亦推恩  
而及物俾崇國本以洽人情其應州宜置彰國軍節度  
仍以興唐軍為寰州隸彰國軍

九月己未幸前隰州刺史袁建豐之第帝在藩邸嘗為



副相得甚歡至是建豐風病沈廢於私第以舊愛親幸  
撫慰之

二年四月贈故振武軍節度使李嗣昭為太尉嗣昭天  
祐十五年卒於太原帝舊敦分義臨御之後念深故人  
故有是詔

十一月乙卯平盧軍節度霍彥威天平軍節度符習入  
覲召昇殿命樂舉酒語及佐命決策之事歡話移時

長慶元年三月以吐谷渾薛萬通為嵐州刺史與帝有

舊故也

十月北京留守馮贇謝恩賜母衣服銀器初贇父在太原潛龍第為家老母出入第中恩意頗厚贇自宣徽使居守晉陽將之任贇母辭於宮中帝謂贇母曰吾輩老矣贇昨來總角兒走吾前今日便得氣力吾頃在太原為偏將視節度使富貴極矣彼時吾不敢懷望將帥今贇為留守節度使耳姥更宜內訓撫我鄉里生民是日錫以金繒及至任每因中使往即慰問之

三年二月以李從縶檢校尚書右僕射右衛將軍劉遂  
凝檢校戶部尚書右監門衛將軍韓昭裔檢校戶部員  
外郎守太子左贊善大夫仍賜紫金魚袋趙筠檢校兵  
部尚書王再友檢校刑部尚書胡漳檢校國子祭酒史  
延翰檢校右散騎常侍皆帝在藩舊參佐也

四年八月乙丑帝顧謂侍臣曰前洋帥陳臯稱病甚乞  
致仕信乎對曰實然帝因愴然改容良久曰陳臯昔為  
健兒從吾征伐操戈擐甲氣吞豺虎今衰落如此浮生

壯健都幾何時哉咄嗟久之因令孟漢瓊往勞問

安金全初仕莊宗為騎將與帝尤相善天成初召金全  
歸朝授振武節鉞同平章事

何瓚初仕莊宗判留守於北京及帝繼嗣日召還見  
於秘殿帝念及故舊勞問久之厚加賜賚

李建崇初仕莊宗以不能巧官久滯偏裨帝嘗掌牙兵  
與建崇共事甚愜之連授磁沁二州刺史

曹英本常山真定人父全武事趙王鎔為列校英因得

隸鎔帳下及莊宗奄有其地錄其左右收為散指揮使  
帝即位英侍於伎下問其祖考英以實對帝曰乃朕之  
舊也擢本班行首每加顧遇

藥縱之初依帝攝代州衙推及鎮邢洺為書記自是移  
鎮常山被天平宣武兩鎮節度副使帝鎮常山被病不  
隨及踐阼縱之請見于雒邑安重誨怒其觀望半歲餘  
無所授言事者聞於帝帝曰德勝用兵時縱之饑寒相  
半不離我左右今有天下何人不富貴獨委縱之何以

勸勞且遽召見之浹旬除磁州刺史

愍帝長興四年十一月即位丙辰以天雄軍節度判官  
唐洎為左諫議大夫掌書記趙彖為起居郎攝觀察推  
官吳承範為左拾遺左都押衙宋令詢為磁州刺史皆  
帝帥鄴時文武參佐也唐洎舉進士自帝帥宣武時從  
事歷太原真定三府帝喜儒學洎之所啓也故有此授  
又以天雄軍巡官殷鵬為右拾遺鵬與吳承範俱魏州  
人舉進士會帝為帥歸鄉里依之故有是超授焉

應順元年正月以前洛州團練使皇甫立為保大軍節度立明宗微時舊人也性不趨競同時數輩皆秉節鉞

唯立纔及二十石朱馮舉勞其舊故有是命

臣欽若等曰朱弘昭

馮贊皆當

時宰相

末帝初天成中出鎮河中府房嵩者京兆長安人也少為唐宰相崔魏公家臣後因亂客於蒲州於路左迎謁帝求事軍門帝受之使治賓客及登極歷南北院宣徽使

清泰元年以左諫議大夫盧損為右散騎常侍損嘗奉使河中與帝款接故也

五月以右千牛衛上將符彥饒充左右翊衛都指揮使彥饒舊典禁軍明宗朝立定亂之功今春以伯氏安州不治而入宿衛帝游舊也故復委任之

六月以前均州刺史韓遠為羽林將軍前申州刺史李干為右驍衛將軍前河東行軍司馬李繼忠為左驍衛將軍前鄜州行軍司馬韓昭為左武衛將軍前彰義行



軍司馬喬神劍為右武衛將軍前青州行軍郭師肇為  
右武衛將軍前安州行軍司馬石延贊為右監門衛將  
軍前同州行軍司馬趙彥鐸為左監門衛將軍帝久親  
戎事皆舊部校也故有是獎錄焉

辛巳以太子太傅致仕王建立兼侍中充天平軍節度  
鄆齊棣等州觀察處置等使建立以微賤事明宗與帝  
少而周旋備嘗艱苦明宗鎮真定詔入朝以建立巡檢  
知畱守事及即位遂用為節度使後歷數鎮長興中致

仕帝與之親舊乃有是拜

七月詔禮部郎中知制誥呂琦賜紫金魚袋初帝河中失守歸清化里第罕得出入琦寓止在帝左右凡有奏請謀度之事遣韓昭諮於琦而後行既君天下深念疇昔故前命知制誥至是有金章之錫庚申贈前京兆府高陵令郝翊為兵部郎中故鳳翔節度押衙朱廷乂為尚書右僕射初帝在岐陽將起兵召謀畧之士翊自言有鬼谷禪闔之術廷乂自許氣俠令二人相繼往長安

說王思同二人未還會藥彥稠至知是岐下來思同不  
獲已拘翊送京師廷又初謂帝曰必令思同効用事或  
踟躕勞一七首耳從者以此語告思同乃殺之故有是  
贈

二年九月詔以量移同州長流人放歸鄉里司徒翊為  
相州司馬翊與帝有賓筵之舊初流寧州移同州又放  
歸本貫路繇都下遣人慰勞便欲留之韓昭曰同列八  
人翊獨異之非典也用之非晚至是欲召還昭又曰八

人類例止可復資無宜異等故有此授初帝在河中翊  
為判官明宗時諸子中秦王為河南尹判六軍王府最  
盛翊因入貢祈安重誨願不歸蒲中乃授右補闕史館  
修撰無幾為戶部員外郎充河南府判官明宗寢疾秦  
王構逆翊與諸從至天津秦王兵敗各贖為庶民洎帝  
御極翊益懷憂悸帝念舊至是先復資旋用為兵部員  
外郎

晉高祖天福元年以王岷為將作監岷河內人歷河陽

度支使鄴都河東少尹與帝潛龍時有舊也

四年二月中書門下上言陛下應天順人握圖御宇電  
遶虹流之地既煥禎符出潛離隱之鄉宜光稱謂其太  
原潛龍莊望建為慶昌宮使相鄉望改為龍飛鄉都尉  
里望改為神光里從之

李瓊初仕後唐隸明宗麾下為小校同光二年明宗受  
詔以本道兵送糧入薊門時帝從行至涿州與虜相遇  
帝陷于圍中瓊顧諸軍已退密牽帝之衣指東而遁至

劉李河為虜所籠瓊浮水先至南岸帝至河中馬倒順  
流而下瓊以所執長矛援帝出之又以所跨馬奉帝瓊  
徒步從之奔十里餘乃入涿州帝薦於明宗明宗賞之  
尋超授軍職帝即位補護聖都虞候又念疇昔輟馬導  
護之力前後所賜金帛甚厚久之領橫州刺史遷申州  
刺史

安審暉為河東行軍司馬帝龍飛以霸府上僚授振武  
兵馬留後遷河陽節度使不踰月移鎮鄜州

李崧後唐長興中為樞密直學士時契丹寇雲中明宗欲命重將鎮太原時帝為六軍副使以秦王從榮不軌懇求外任深有北門之望而大臣以帝方權兵柄難以議之翌日明宗怒其未奏范延光趙延壽等無對退歸本院共議其事方欲以康義誠為之時崧最在下位聳立請曰朝廷重兵多在北邊須以重臣為帥以某所見非石太尉不可也會明宗令中使促之衆乃從其議翌日帝既受太原之命使心腹達意於崧云壘浮圖須與

合却尖欲使崧終始成已事也及清泰末帝入雒崧與呂琦俱竄匿於伊闕民家旬日帝召為戶部侍郎判戶部踰月拜中書侍郎平章事與桑維翰並兼樞密使

王繼弘初為後唐明宗爪牙時帝為偏將與梁人戰於河壩短兵相接帝為梁人所襲而馬甲連革斷會漢高祖以馬授之獲濟繼弘適在其部有後助之力帝即位擢為六宅副使

漢高祖踐阼以郭謹鄉國舊臣加檢校太尉移鎮滑臺



乾祐初復授彰德軍節度使二年就加檢校太師三年春入朝加食邑是歲冬十月卒於位年六十輟視朝兩日贈侍中

周太祖廣順元年三月幸城西城南御園及史弘肇園帝嘗與弘肇遊宴其間臨觴嗟嘆久之

七月昭義節度使常思上言曰臣妻王氏入貢蒙陛下致敬臣惶恐無容自處詔曰朕以君臣之道則外有朝廷之儀骨肉之親則內有少長之敬且朕與卿當風昔

之共事實敦叙于周親安可此時使渝曩分卿執恭為  
行滌懇上章雖謙謙之道可嘉而親親之義難替家人  
之禮朕當必行帝微時常思在上黨思夫婦奉帝甚謹  
帝德之及貴遇恩益厚雖居至尊之位猶行家人之禮  
三年三月賜刑部郎中景範金紫服霸府舊僚也

二年八月以安國軍節度使劉詞為河陽三城節度使  
詞性忠實帝龍潛時累同征伐頗深委信永壽節來朝  
帝內殿與詞從容話舊曰吾輩老矣自覺心力減耗於

前幸兒輩幹於庶事移公近鎮與易相面

王俊為樞密使性輕躁率易帝以故舊諳其為人且以  
佐命之故每優容之俊年長於帝二歲帝雖登大位時  
以兄呼之有時呼字不忘布衣之契俊以此益自負焉  
世宗即位初以給事中張可復有澶淵幕府之舊拜為  
右散騎常侍

周彥頤與帝有舊及即位超授內客省使未幾知相州  
軍府事尋改延州兵馬留後到鎮頗以貨殖為意窺圖

賸利浸漁蕃漢部人羣情大擾會帝南征蕃部結聚圍  
迫州城彥顧閉壁自守求援於鄰道賴救兵至乃解帝  
不悅徵赴京師然猶委曲庇護竟不之責

王朴自帝鎮澶淵朝廷以朴為記室及帝為開府尹拜  
右拾遺充開封府推官帝嗣位改比部郎中賜紫



冊府元龜卷一百七十二

欽定四庫全書

子部  
冊府元龜卷一百七十三  
七

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣李荃

謄錄監生臣梁徽

欽定四庫全書

冊府元龜卷一百七十三 宋 王欽若等 撰

帝王部

繼絕

自古受命及中興之君莫不興滅繼絕以歸天下之心  
焉書稱虞賓在位羣后德讓謂雖丹朱之不肖而以帝  
堯神明之後尊而禮之故周武克商未及下車追存賢  
聖爵而祿之以奉祭祀俾故老遺俗感仁澤之至厚繼

體守文存鑒戒之悠遠致恭三恪其義益顯炎漢而下  
封崇尤盛至於六國餘烈佐命元勳籍其名數罔有家  
食斯又念功勸勞之深旨也

夏禹踐天子之位堯子丹朱舜子商均皆有疆土

以唐封堯

之子以虞封舜之子以奉其先祀服其服禮樂如之以客見天子

天子弗臣示不敢專也

周武王勝殷封紂子武庚祿父以續殷祀使管叔蔡叔  
傅相之又追思先聖王乃褒封神農之後於焦

弘農陝縣有焦



城故焦國也

黃帝之後於祝帝堯之後於薊

燕國有薊縣

帝舜之

後於陳

舜妻堯之二女居於媯其後因以為氏舜子商均為封國夏後之時或失或續至是求舜後有

媯滿封之

大禹之後於杞

禹之苗裔殷時或封或續至是求禹之後得東樓公封之

以奉夏后氏祀

成王即位少周公旦代立行政當國管蔡疑之乃與

武庚作亂欲襲成王周公

一云欲襲成周

周公既承成王命

誅武庚殺管叔放蔡叔乃命微子開代殷後奉其先

祀作微子之命

封命之書

王若曰猷殷王元子

微子帝乙元子故順

道本而稱之惟稽古崇德象賢惟考古典有尊德象賢之義言今法之統承

先王修其禮物

言二王之後各修其典禮正朔服色與時王並通三統

作賓于

王家與國咸休永世無窮

為時王賓客與時皆美長世無窮

嗚呼乃

祖成湯克齊聖廣淵

言汝祖成湯能齊德聖達廣大深遠澤流後世

皇天眷

佑誕受厥命

皇天眷顧湯佑助之大受其命謂天命

撫民以寬除其邪

虐

湯撫民以寬德除桀邪虐之政

功加於時德垂後裔

言湯立功加于當時德澤

垂及後世裔末也

爾惟踐修厥猷舊有令聞

汝微子言能踐湯德久有善譽

昭聞遠近

恪慎克孝肅恭神人予嘉乃德曰篤不忘

言微子敬

慎能孝肅恭神人故我  
善汝德謂厚不可忘

上帝時歆下民祗協庸建爾

于上公尹茲東夏

孝恭之人祭祀則神歆享施令則人敬和用是封立汝於上公之位

正此東方華夏之國宋在京師東

欽哉往敷乃訓慎乃服命率繇典

常以蕃王室

欽哉敬其為君之德往臨大布汝教訓慎汝祖服命循用舊典無失其常以藩

屏周室戒之

弘乃烈祖律乃有民永綏厥位毗予一人

女大

烈祖成湯之道以法度齊汝所有之人則長安其位以輔我一人言上下同祭慶

世世享德

萬邦作式

言微子累世享德不忝厥祖雖同公侯而特為萬邦法式

俾我有周無

斁

汝世祖享德則使我無厭

嗚呼往哉惟休無替朕命微子

乃代武庚殷之餘民甚愛戴之故周頌有客微子來見祖廟也振鷺二王之後來助祭也

二王夏殷也其後祀也宋也

漢高祖十年帝至邯鄲求樂毅後得其孫叔封之樂鄉

在洪新城號曰華成君

文帝元年封舞陽侯樊噲庶子市人為侯初噲子伉呂后妹呂須之子嗣舞陽侯高后薨大臣誅呂須等因誅伉數月帝立廼復封市人為侯復故邑

後三年以絳侯周勃子亞夫為條侯初勃子勝之嗣絳

侯尚公主不相中也

意不相可也

坐殺人死國絕一年帝乃

擇勃子賢者河內太守亞夫嗣勃後

景帝二年制詔御史故相國蕭何高皇帝大功臣所與

為天下也

為治也一曰共造其功業

今其祀絕朕甚憐之其以武陽

縣戶二千封何孫嘉為列侯

一作舞陽嘉兄有罪免

六年以絳侯周勃子堅為平曲侯續絳侯後

以勃子亞夫有罪死

絕國

中元年以高景侯周成孫應紹封高景侯

初成以父苛為項籍死事

子快文帝五年謀反誅

三年以曲周侯酈商子堅紹封曲周侯

初商子寄  
嗣有罪免

六年以河陵侯郭亭孫延居紹封河陵侯

初亭孫容  
嗣有罪免

費

侯陳賀子最紹封費侯

初賀子  
常嗣卒

後元年以杜衍侯王翥子郢人紹封杜衍侯

初翥孫市  
臣嗣亡後

武帝元光二年以平定侯齊受曾孫延居紹封平定侯

初受孫  
嗣亡後

元狩三年詔御史以鄼戶二千四百封蕭何曾孫慶為

鄩侯布告天下令明知朕報蕭相國德也

初何曾孫勝  
嗣坐侍祠不

齊耐  
而隸

元鼎四年帝祠后土還至雒陽求周苗裔封其後嘉三十里地比列侯奉其先祭詔曰祭地冀州瞻望河雒巡省豫州觀於周室邈而無祀詢問耆老乃得孽子嘉其封嘉為周子南君

後元年以游擊將軍按道侯韓說子增一作曾紹封龍

頌侯初說子興嗣征和四年坐巫蠱誅一云坐祝帝

曰游擊將軍死事無論坐者

說當時極巫蠱於太子宮為太子所殺死於國

事與雖以巫蠱見誅其昆弟宗族應從坐者可勿論之

乃復封興弟增為龍頤

侯

宣帝地節四年詔丞相御史求問蕭相國後在者得  
玄孫建世等十二人復下詔以鄴戶二千封建世為  
鄴侯

元康元年復高皇帝功臣絳侯周勃等一百三十六人  
家子孫令奉祭祀世世勿絕其母嗣者復其次



元帝初元五年正月以周子南君

姓姬名延年  
嘉之孫也

為周承

休侯

承休國  
在潁川

位次諸侯王

是時帝使諸大夫博士求殷  
後分散為十餘姓郡國往往

得其大家推求子孫絕不能紀時丞相奏議以為王者  
存二王後所以尊其先王而通三統也其犯誅絕之罪  
者絕而更封他親為始封君上承其王者之始祖春秋  
之義諸侯不能守其社稷者絕今宋國已不守其統而  
失國矣則宜更立殷後為始封君而上承湯統非當繼  
宋之絕侯也宜明殷後而已今之故宋惟求其嫡嫡之  
先已絕不當得立禮記孔子曰丘殷人也先師所  
共傳宜以孔子世為湯後帝以其語不經遂見寢

成帝鴻嘉元年制詔丞相御史蓋聞褒功德繼絕統所

以重宗廟廣賢聖之路也故博陽侯丙吉以舊恩有功

而封今其祀絕朕甚憐之夫善善及乎子孫古今之通  
誼也其封吉孫中郎將關內侯昌為博陽侯奉吉後國  
絕三十二歲復續

元延元年十月封蕭相國後

一云玄孫之子

南繚長喜

繚鉅鹿邑名喜

為此縣長

為鄼侯

時功臣子孫多廢絕杜業說曰昔唐以萬國致時雍之政虞夏以羣后饗恭已之治

湯法三聖殷民太平周封八百重譯來賀使以內恕之君樂繼絕世隆名之主安立亡國至於不及下車德念深矣成王察牧野之克顧羣后之勤知其恩結于民心功光于王府也故追述先父之志錄遺老之策高其位大其寓愛敬斯盡命賜備厚大孝之隆于是為至至其沒也世主歎其功無民而不思所息之樹且猶不伐况

其廟乎是以燕齊之祀與周並溥子繼弟及歷載不墜  
豈無刑辟繇祖之竭力故支庶賴焉迹漢功臣亦皆剖  
符世爵受山河之誓存以著其號亡以顯其魄賞亦不  
細矣百餘年間而襲封者盡或絕氏姓或乏無主朽骨  
孤於墓苗裔流於道生為愍隸死為轉屍以往况今甚  
可悲傷聖朝憐憫詔求其後四方忻忻靡不歸心出入  
數年而不省察忍議者不思大義設言虛亡則慮德掩  
義遊東布章非所以視化勸後世也三人為衆雖難盡  
繼宜從尤功於是  
成帝復詔蕭何

綏和元年二月詔曰蓋聞王者必存二王之後所以通

三統也

天地人並為三統二  
王之後並以為三

昔成湯受命列為三代

夏商

周而祭祀廢絕考求其後莫正孔吉

無若孔吉  
最正也

其封吉

為殷紹嘉侯三月進爵為公及周承休侯皆為公地各

百里

一云二月甲子封殷後孔子世吉適子何齊為紹嘉侯後六月進爵為公地方百里元始二年更為

宋公

哀帝元壽二年封平陽侯曹參玄孫之孫本始為平陽

侯

參玄孫宗有罪免為城旦至是以本始紹封

平帝元始元年正月令諸侯王公列侯關內侯無子而

有孫若子同產子者皆得以為嗣

子同產子者謂養昆弟之子為子者

公

列侯嗣子有罪耐以上先請宗室屬未盡而以罪絕者

復其屬於是封龍頌侯韓增兄子岑為龍頌侯

初增子  
寶嗣亡

後岑一  
作共

六月封周公後公孫相如為褒魯侯

二年四月封故大司馬博陸侯霍光從父昆弟曾孫陽

宣平侯張敖玄孫慶忌絳侯周勃玄孫共舞陽侯樊噲

玄孫之子章皆為列侯復爵賜故曲周侯酈商等後

玄孫酈明友等百一十三人爵關內侯食邑各有差

是歲

賜曲逆侯陳平代後者  
鳳爵關內侯不言世

後漢光武建武二年五月封周後姬常為周承休公

承休

所封故城在  
今汝州東北

五年二月壬申封殷後孔安為殷紹嘉公

十三年二月庚午以殷紹嘉公孔安為宋公周承休公

姬常為衛公

以為漢賓  
在三公上

明帝永平十四年封安豐侯竇融孫嘉為安豐侯初融  
子穆穆子勲俱以罪死詔還融夫人與小孫一人居雒陽家  
舍至是封勲弟嘉為定豐侯食邑二千奉融後

章帝建初元年封膠東侯賈復少子邯為膠東侯邯弟  
宗為即墨侯各一縣初復子忠嗣忠卒子敏嗣坐誣告  
母殺人國除

二年封平陽侯曹參後湛為平陽侯又封東光侯耿純  
孫盱為高亭侯初純子阜嗣徙封莒鄉侯永平四年坐  
同族耿歙與楚人顏忠辭語相連國除

七年十月西巡狩數召奉車都尉韋彪入問三輔舊事  
禮儀風俗彪因建言今西巡舊都宜追錄高祖中宗功

臣褒顯先勲紀其子孫帝納之行至長安乃制詔京兆尹右扶風求蕭何霍光後時光無苗裔唯封何末孫熊為鄴侯

八年以廣平侯吳漢孫旦為濯陽侯

濯陽縣名屬汝南郡

旦卒無子

國除帝徙旦弟筑陽侯盱為平春侯

平春縣名屬江夏

以奉漢

祠

和帝永元三年十一月幸長安詔曰高祖功臣蕭曹為首有傳世不絕之義曹相國後容城侯無嗣朕望長陵



東門見二臣之壠

蕭何墓在長陵東司馬門道北百步曹參冢在長陵旁道北近蕭何冢

循其遠節每有感焉忠義獲寵古今所同可遣使者以

中牢祠大鴻臚求之近親宜為嗣者須景風紹封以彰

厥功

大鴻臚掌封拜諸侯及其嗣春秋考異邨曰夏至四十五日景風至則封有功臣也

安帝永初六年詔曰夫仁不遺親義不忘勞興滅繼絕

善及子孫古之典也

論語曰興滅國繼絕世公羊傳曰善善及子孫惡惡止其身

昔

我光武受命中興恢弘聖緒橫被四表昭格上下

昭明也格

至也上

下天地光耀萬世祉祚流行垂於罔極予末小子夙夜

永思追惟勲烈披圖漢籍建武元功二十八將佐命虎

臣讖記有徵蓋蕭曹紹封傳繼於今

和帝紹封蕭曹之後以彰厥功也

況此未遠而或至乏祀朕甚愍之其條二十八將無嗣

絕世若犯罪奪國其子孫應當繼後者分別署狀上將

及景風章叙舊德顯茲遺功焉初膠東侯賈復孫平鄉

侯普有罪國除於是紹封普子晨為平鄉侯

明年二十八將絕國

者皆紹封焉

七年詔封安平侯蓋延曾孫恢為蘆亭侯

初延子扶嗣扶卒子側嗣

側永平十三年坐與勇  
王平謀反伏誅國除  
揚虛侯馬武孫震為謬亭侯初武

子檀嗣坐兄伯濟與楚  
王英黨顏忠謀反國除  
昆陽侯傅俊孫鐵為高置亭侯

初俊子昌嗣徙封蕪湖侯建初中遭母憂上書以國貧  
不願之封乞錢五十萬為關內侯章帝怒貶為關內侯

竟不賜錢  
參蘧鄉侯杜茂孫奉為安樂亭侯初茂子元嗣永平十四年坐與

東平王等謀反  
減死一等國除  
櫟陽侯景丹孫遽為監亭侯初丹子尚嗣徙封余吾侯

尚卒子苞嗣苞卒子  
臨嗣臨無子國除  
鬲侯朱祐曾孫沖為鬲侯初祐子商嗣商

卒子演嗣演以永元十四年坐從兄  
伯為外孫陰皇后巫蠱事免為庶人  
槐里侯萬修曾孫

豐為曲平亭侯初修子普嗣徙封注氏侯普卒子親嗣徙封扶柳侯親卒無子國除  
中水

侯李忠孫純為琴亭侯

初忠子威嗣威卒子純嗣永平九年坐母殺純叔父國除一云

殺威弟季

許侯馬光子朗為合鄉侯

初光就國因竇憲奴誣光與憲逆自殺

元初元年封靈壽侯邳彤孫音為平亭侯初彤子湯嗣

湯卒子某嗣

臣欽若等曰史闕名

無子國除於是紹封

三年封順侯馬廖孫度為潁陽侯初廖子遵嗣徙封程

鄉侯遵卒無子國除於是紹封

永寧元年封朗陵侯臧宮曾孫繇為朗陵侯初繇兄松

嗣侯元初四年與母別居國除至是封繇

建光二年封舞陰侯岑彭

一作舞陽

曾孫杞為細陽侯初彭

征蜀薨子遵嗣徙封細陽侯

細陽縣名故城在今汝陰縣西

遵卒子伉

嗣伉卒子杞嗣

杞一作起

元初三年坐事失國至是復封

順帝陽嘉三年封林慮公主子耿寶子箕為牟平侯初

寶弟子承襲公主爵為林慮侯後閻太后以寶等阿附

嬖倖共為不道策免寶及承皆貶爵為亭侯遣就國寶

於道自殺國除大貴人數為耿請乃詔封之

桓帝延熹二年詔封全椒侯馬成玄孫昌為益陽亭侯

成六世孫配嗣棘陵侯  
以罪失國于是封之

槐里侯萬修玄孫恭為門德亭

侯

初修曾孫豐為曲平亭侯  
豐卒子熾嗣無子國除

魏文帝黃初中賜蔭令亭侯田疇從孫續爵關內侯以

奉其嗣

疇從太祖平烏丸有功封亭侯邑五百戶疇  
固讓不受及卒子又早死於是封其從孫

紹

封陵樹亭侯荀攸孫彪為陵樹亭侯

初攸子適嗣  
無子國除

都亭

侯任峻中子覽為關內侯

初峻子先嗣  
無子國除

都亭侯蘇則子

愉為都亭侯

初則子怡  
嗣無子

明帝青龍二年三月庚寅山陽公薨

漢獻  
帝也

八月壬申葬

于山陽國適孫桂氏鄉侯康嗣立為山陽公

高貴鄉公正元元年紹功臣世封荊州牧昌陵鄉侯夏

侯尚從孫本為昌陵亭侯邑三百戶以奉尚後

初尚子  
玄嗣以

謀廢司馬景  
王夷三族

甘露二年報封河東太守豐樂亭侯杜畿孫預為豐樂

亭侯邑百戶初畿子恕嗣免為庶人徙章武郡是歲河

東樂詳年九十餘上書訟畿之遺績朝廷感焉

陳留王景元四年封蘭陵侯王肅子恂為蘭陵侯

晉武帝泰始元年十二月詔曰昔太尉王凌謀廢齊王而王竟不足以守位征西將軍鄧艾矜功失節實應大辟然被書之日罷遣人衆束手受罪比於求生遂為惡者誠復不同今大赦得還若無子孫者聽使立後令祭祀不絕

元帝時以太尉臨淮公荀顛兄立孫序為顛後封臨淮公又封蘭陵公衛瓘立孫崇為江夏郡公

明帝大寧三年七月詔曰三恪二王世代之所重興滅



繼絕政道之所先又宗室哲王有功勲於大晉受命之際者佐命功臣碩德名賢三祖所與共維大業咸開國祚土誓同山河者而並廢絕禋祀不傳甚用懷傷主者其詳議請應立後者以聞

成帝咸和元年十月封魏武帝玄孫曹勳為陳留王

咸康二年十月詔曰歷觀先代莫不褒崇明祀賓禮三恪故祀宋啟土光於周典宗姬侯衛垂美漢冊自頃喪亂庶邦殄悴周漢之後絕而莫繼其詳求衛公山陽公

近屬有履行修明可以繼承其祀者依舊典施行

孝武帝太元二年正月繼絕世紹功臣詔曰故太尉西平公張軌著德遐域世襲前勞強兵縱害遂至失守散騎常侍天錫拔迹登朝先祀淪替用增矜慨可復天錫西平郡公爵又封太尉臨淮公荀顛兄玄孫序之子為臨淮公以繼顛後又封博陵王沈從孫道素為博陵公又封高平公陳騫玄孫襲爵高平公

以騫孫粹嗣後遇害故也

後魏大武時求故司空封西昌侯庾岳子孫任為將帥

者得其子陵從征有功聽襲爵

岳道武時誅之人咸寃惜焉

延和初詔曰故征西將軍爵臨淮公丘堆國之肺腑勳著先朝西征喪師遂從軍法國除祀絕朕甚愍之可賜

其子跋爵淮陵侯

初堆與奚斤進平赫連昌斤追擊昌弟定留堆守輜重斤為定所擒堆棄

甲走長安大武大怒遣安頡斬之

孝文延興元年冬詔訪舜後獲東萊郡民媯苟之復其家畢世以彰盛德之不朽

宣武繼絕世詔以故萬騎大將軍封弘農王奚斤諸弟

子鑒特詔其後以承封邑

初斤薨子他觀襲爵他觀為將征懸瓠卒於軍子延襲爵

出為萬城鎮將卒子緒襲爵開建五等封恒農郡開國侯食邑三百戶後例降為縣改封登城縣開國侯增邑

九百戶卒子遵襲爵卒無子國除

又詔復故試守河內郡陸琇爵以子

景祚襲

陸俊為征西大將軍封東平王薨子馥襲馥卒子琇襲琇為祠部尚書免官試守河內郡咸陽

王禧謀反令于曇和先據河內琇聞禧敗斬曇和首時以琇不先送曇和禧敗始斬首責其通情徵詣廷尉死於獄琇弟凱上書

訴寃乃詔復之

隋文帝以周後宇文雒為介國公賓於隋

煬帝大業四年十月辛亥詔曰昔周王下車首封唐虞

之裔漢帝承歷亦命殷周之後皆所以褒立先代憲章  
在昔朕嗣膺景業旁求雅訓有一弘益欽若令典以為  
周兼夏殷文質大備漢有天下車書混一魏晉紹襲風  
流未遠並宜立後以存繼絕之義有司可求其冑緒別  
聞

唐高祖武德元年五月二十三日詔曰革命創制禮樂  
變於三王修廢繼絕德澤隆於二代是以鳴條尅伐杞  
用夏郊牧野降休宋承殷祀爰及魏晉禪代相仍山陽

賜號於當塗陳留受封於典午上天迴睠授歷朕躬隋氏順時遜其實位敬奉休命敢不對揚永作我賓宜開土宇其以莒之鄒邑奉隋帝為鄒公行隋正朔車旗服色一依舊章仍立周後介公共為二王後二年五月鄒公薨追崇為隋帝謚曰恭

太宗貞觀二年八月制曰二王之後禮數宜崇寢廟不修廩餼多闕非所以追崇先代式敬國賓可令所司量置國官營立廟宇

中宗神龍元年五月制仍舊以周隋為二王後

先永昌元年以

周漢之後為二王仍封舜禹成湯之裔為三恪

玄宗開元三年二月勅二王後每年四時饗廟牲及祭服祭器並官給其帷帳几案有闕亦官給主客司四時省問子孫准同正三品蔭隋後每年給絹三百匹米粟二百石並春秋支給仍准見承襲人親兄無分襲者與三分餘各一分兄弟有得職事官者其物即還見襲人五年二月行幸東都大赦制武德貞觀以來勲臣子孫

無在任者更詳求其後奏聞

十一年十一月南郊大赦詔武德以來實封功臣知政  
宰輔有身無大故而亡官失封子孫淪屈者所司勘責  
具以狀聞存者可疇其官榮逝者當錄其裔嗣使幽明  
同慶知有今辰

十五年閏九月勅二王後為賓者會賜同京官正三品  
其夫人亦同諸王公以下無子孫以兄弟為後曾經侍  
養者聽其承襲

贈爵者亦准此

若死王事雖不曾經侍養亦聽



承襲又二王後犯罪當除爵者改立次賢

二十五年六月辛酉制曰夏典有虞賓之位周書載微子之封皆所以啟迪前王發揮後嗣故介國公宇文超男晏倬彼茂緒曰予嘉客肅雍成性溫潤合禮雅有助祭之容宛是宜邦之具爰復爾國以承天休可襲封介國公

天寶七載五月詔曰自古帝王建邦受命必敬先代以循舊章周備禮文既存三恪之位漢存損益唯立二王

之後自茲以降具復因循將廣繼絕之恩式弘復古之道宜於後魏子孫中簡擇譜屬灼然相承者一人委所司勘責准鄒公例定為三恪

八載制曰胡公啟陳微子分宋位存三恪秩比二王後魏孝文帝十代孫元伯明器蘊中和業彰前烈保大明之餘慶標幹蠱之良才謙而不渝信而可復固當纂承殷後式備虞賓頃屬覃恩爰崇繼絕主魏祀者非爾而誰受茲寵章無忝負荷宜大啟於土宇俾光膺於禮物

可襲封韓國公食邑三千戶

九載處士崔昌上封事推五行之運以國家合承周漢其周隋不合為二王後請廢詔下尚書省集公卿議昌負獨見之明羣議不屈會集賢院學士衛包抗表陳論議之夜四星聚於尾宿天意昭然帝心遂定乃求殷周漢後為三恪廢韓介鄒等公以昌為左贊善大夫包為虞部員外郎

肅宗乾元元年四月大赦天下詔曰二王三恪各與一

子官

德宗以大曆十四年即位詔二王三恪褒聖侯各與一子官

貞元五年三月詔曰懷舊念功仁之大也興滅繼絕義之弘也昔蔡叔圯族周公封其子於東土韓信干紀漢后爵其孥以弓高侯君集之不率景化我太宗存其嗣以主祀詳考先王之道洎乎烈祖之訓皆以刑佐德俾人嚮方則斧鉞之誅兵甲之伐蓋不得已而用也曩歲

盜臣竊發國步多虞朕狩於近郊指期薄伐將振昆陽  
之旅以興涿鹿之功徵師未達於諸侯衛士且疲於士  
卒而李懷光三軍夙駕千里勤王上假雷霆之威下逐  
虎狼之衆議功方始守節靡終潛構禍胎拒違朝命棄  
同即異捨順効逆為臣至此在法必誅猶示綏懷庶其  
牽復而梟音益勵猿突莫遷大戮可加曾無噍類雖自  
貽伊戚與衆棄之而言念爾勞何嗟及此以其前效猶  
在孤魂無歸懷之怛然是用悽軫予欲布陳大信冀以

成化保合太和期以刑措宜以懷光外孫燕八八賜姓  
李氏名承緒授左衛率府曹曹參軍承懷光之後仍賜  
錢一千貫在於懷光墓側置立莊園侍養懷光妻王氏  
并備四時享奠之禮嗚呼朕甚不德臨於兆人泣辜宥  
罪素誠所志爾其保姓受氏宣力承家勉紹乃考之建  
國庸無若爾父之違王命初懷光授首其子璫瑗等皆  
死唯妻王氏在帝特赦其死及是又思懷光舊勲哀其  
絕後乃命承緒繼之

九年十一月日南至郊祀禮畢大赦天下詔九廟配享  
功臣封爵廢絕者宜令紹封以時享祀

十三年五月封前左衛率府兵曹同正元份為襲三恪  
韓國公

順宗以貞元二十一年正月即位制曰二王三恪褒聖  
侯各與一子官

穆宗以元和十五年即位閏正月二王介國公宇文仲  
達卒命有司舉舊典葬祭

敬宗寶曆元年八月戊申以故鄴國公楊造男前行左  
內率府曹參軍元湊襲鄴國公食邑三千戶

文宗太和五年正月鄴國公楊元湊奏臣先祖隋文帝  
等陵四所在鳳翔一所在揚州兩所在京兆府准去年  
四月九日勅二王後介國公先祖陵例每陵每月合給  
看守丁三人鳳翔府已蒙給丁其京兆府及揚州未蒙  
准勅旨詔各令州府准元勅處分

後唐莊宗同光二年二月詔曰皇帝御宇禮三恪而為



賓烈士敦風賴五帝而濟世當宜封崇後裔欽奉前修  
應前代二王三恪及文宣王之後並可各令繼襲仍加  
恩命所有祖宗廟宇亦宜各與增修其隨處合得俸戶  
并子孫戶下差稅徭役仍委中書門下檢本朝格律施  
行

明宗天成四年八月以二王後前河清縣令襲封鄴國  
公食邑三千戶楊仁規為秘書丞

長興三年五月以二王後前詹事府司直楊延紹為贊

善大夫仍襲封鄆國公食邑三千

末帝清泰三年將作監丞襲封介國公宇文頡奏蒙恩襲封除官無襲爵俸給詔特給本官俸

晉高祖天福二年正月勅周以杞宋封夏殷之後為二王後兼封舜之後為三恪唐以周隋之後封公又封魏之後為三恪夫應天開國恭己臨人宜覃繼絕之恩以廣延洪之道宜於唐朝宗屬中取一人封公世襲兼隋之鄆公為二王後以後周介公備三恪其主祀及赴大

朝會委所司具典籍申奏其唐朝宗屬中舊在朝及諸  
為官者各據資歷考限滿日循品秩序遷已有出身者  
任令叅選

十一月二王後太子右贊善大夫襲鄜國楊延壽父大  
理評事鄴贈太子中舍

四年九月癸未勅周受龍圖立夏殷之祀唐膺鳳曆開  
鄜介之封歷代相沿百王不易朕顯符景運肇啟丕基  
乃睽前朝載稽舊典宜開土宇俾奉宗祧周推繼絕之

仁以示惟新之德宜以郇國三千戶封唐許王李從益為郇公奉唐之祀服色旌旗一依舊制以西京至德宮為廟牲帛器服悉從官給

五年正月庚寅以二王後前太子右贊善大夫襲封鄴國公食邑三千戶楊延壽為太子左諭德三恪後汝州襄城縣令襲介國公宇文頡加食邑三千戶

六年二月以三恪後汝州襄城縣令襲封介國公食邑三千戶宇文頡為太子率更令

漢隱帝即位詔唐晉兩朝求訪子孫立為二王後

周太祖廣順元年正月五日制以晉漢之裔為二王後  
委中書門下處分

其年十月以李重玉為右監門衛將軍重玉明宗之孫  
也父從際莊宗末遇害至太祖授重玉官秩令主祭念  
遺孤卹王者之後也

冊府元龜卷一百七十三